

La risata cuntagiusa.

Un giuvani chiamatu Giuvanninu, avia un difiettu, arridiva sempri. Anchi 'nni li mumienti cchiù tristi e seri, pari stranu, ma nun c'era viersu di putirlu trattiniri. Si susiva la matina e arridiva; stava assittatu pi mangiari e arridiva; iva a lu cimina e arridiva; durmiva e arridiva; travagliava 'ncampagna e arridiva; si liggiva lu giornali e arridiva; anchi si era sulu arridiva; stava a lu bar cu l'amici e arridiva; c'era d'arridiri e arridiva; c'era di chianciri e arridiva. Iddru stessu s'avia stufatu d'arridiri sempri, ma nun sapia comu fari pi stu difiettu eliminari. 'Nà jurnata, si talià a lu specchiu e arridiennu pinsà:

"Nun è vita che po' continuari, mi privu di iri ad un funerali per evitari mali fiuri, tutti l'amici nun mi cridinu, e mi buttunianu, ma iu nun sugnu scemu, si haiu stu difiettu, ma chi puezzu fari?"

Cuntuà a taliarisi a lu specchiu e arridiennu pinsà:

"Sugnu un bieddru carusu, haiu l'uecchi viridi e granni, tanti fimmini avissiru lu piaciri di stari 'nsieme a mia, ma nuddru mi s'avvicina scantannusi di in giru essiri pigliati e di pua sugnu ginirusu, ma a chi serbi si buffuni paru."

In effetti, era piddaveru un carusu bieddru, bravu e bonu supprattuttu, ma intanto stu difiettu era gravi. Avia chiestu finu a lu dutturi, pi putirlu aiutari, ma mancu iddru potti esserci d'aiutu, nun putiennu la risata 'nà malatia cunsiderari. Parlà cu lu patrieparrucu diciennu sempri scumpisciannusi di li risati:

"Parri, chi puezzu fari pì campari cuemu unu nurmali? Lu sacciu cà nun è nà cosa bella, stu difiettu, chiffà nun lu capisciu ca è un prublema? Ma chi puezzu fari? parlu cu vossia, mi vuegliu cunfissari, ma arridiennu, li piccata, Diu mi po' pirdunari?"

Lu parracu, ca lu canuscia da tiempu, nun sapia chi cosa cunsigliari, ma era obligatu a 'na risposta dari, ma d'arridiri si trattiniva pi nun farlu scuraggiari.

“Chi ti puezzu diri figliu miu, è chiaru ca la risata nun fa mali, ma quannu è assà, fastidi certu po’ purtari, ma nun ci fari casu, lu sa è ‘na cosa ca nuddru po’ aggiustari, ma tu confessati lu stessu, Diu lu sapi ca nun ci manchi di rispiettu e di certu ti pirdunirà.”

Passà tiempu, ma rimediù a stu problema nun si truvà, Giuvanninu, allegramenti sempri a ridiri cuntinuà. Ma ‘na jurnata, ‘na signura anziana, a la so casa tuppià, diciennu ca bisuegnu avia di parlaricci un mumientu. Giuvanninu arridiennu si preoccupà, e accomudari a la so casa l’ammità.

“Signù, m’ava scusari, io nun la canuscio, ma nun staiu ridiennu certu pi vossia, haiu stu difiettu nun è ‘na fissaria, arridu sempri e nenti mi po’ firmari, iu ci lu staiu diciennu pi ogni malintesu eliminari, ma nun capisciu cuemu la puezzu aiutari?”

La signura, arridiennu puru iddra, a parlari ‘ncumincià:

“ Giuvannì, io ti canuscio pi la fama ca tu ha, nun haiu mai cu tia parlatu, ma sacciu di li tò buntà. Sugnu cà, sulu pi un mutivu: haiu na niputi ca nun ridi mà, aiutu mi pò dari pi favuri? Accussì tristi nun la puezzu supputari. E’ beddra cuemu lu sulì, avi l’uecchi azzurri di lu mari, è tantu ginirusa ma un difiettu avi assà pisanti, chianci sempri. Si susi la matina e chianci, si talia la televisioni e chianci, parla a telefonu cu l’amici e chianci, va ‘ngiru pi li negozi e chianci, ci veni di chianciri e chianci, sbagliavu, vulia diri ci veni d’arridiri e chianci. Tu lu sa ca la risata è cuntagiusa, ma lu chianti pi fortuna, no, e cuemu vidi, videmma io staiu arridiennu assà, pichissu vulissi prisintaritilla, pi vidiri si cu tia arridiri putrà. Ti va di sta prova effettuari? Però t’avviertu Rusineddra è ‘ngustiusa assà. Praticamenti chianci, pi quantu arridi tu, vidiemmu chi putiemmu cuminari.”

Giuvanninu chiossà si scumpiscià e stuiannusi li lacrimi arridiennu, dissi a la signura di pruvari. La sira stessu, chianciennu, Rusineddra, cà a li paroli mia nun cridiva, curiusa di canusciri unu c’arridia sempri, a la so casa ‘ncredula s’apprisintà. Appena vitti a Giuvanninu, lacrimi cchiù nun ‘nni virsà. La tristizza di lu visu scumpari... miraculu vidirla surridenti, paria tutt’antra cosa, era

evidenti, ca lu carusu ci piacia e la tristizza paria vulata via. Anchi Giuvanninu a vidirla s'emuziunà e di ridiri stavota la finì. L'uecchi di Rusineddra brillavanu d'amuri e chissu bastà pi li du cosi bilanciari, li lacrimi versati e li risati esagirati. Miraculu pariva veramenti, tutti d'è eranu cuemmu si nun avissi ma successu nenti. Arridivanu cuntenti, lacrimi cchiù nun c'eranu e li risati eranu cchù mudirati. La vicchina arridiva a l'ammucciuni, suddisfatta di lu risultatu, l'amuri tutti cosi avia aggiustatu, picca lacrimi, ma d'emuziuni a Rusineddra, e giusti risati di cuntintizza a Giuvanninu 'nnamuratu.

"L'amuri quanti cosi po' aggiustari, pinsà la vicchiareddra, l'haju dittu sempri a Rusineddra mia, ci voli curaggiu 'nni la vita, finiscila di chianciri, sinnò nun ti mariti, sa, cuemu dici lu pruverbiu anticu? Genti allegra Diu l'aiuta!! Ma iddra tistarda, a li paroli, mia subitu chiancia e iu annirbata ci dicia, ma figlia mia, è difficili cu tia parlari. E a dirivi la verità, anchi iu m'avìa 'ncuminciatu a stuffari. Ora, finalmenti 'nnamurata, capì chiddru ca io ci vulia diri e a cori liegiu campa filici, assirinata d'essiri cu Giuvanninu assistimata."

Benedetta !

Canicattì 03/09/2008